

元和郡縣志卷十四

唐 李吉甫 撰

河東道一

河中府 河東赤

開元戶一萬九千七百 案鄉數傳寫缺

今為河中節度使理所 管河中府絳州晉州慈州

管戶四萬一千三百六十五

禹貢冀州之域按今州本帝舜所都蒲坂也春秋時為魏耿楊芮之地左傳曰晉獻公滅魏以賜畢萬服虔注

元和郡縣志 卷十四 一

曰魏在晉之蒲坂畢萬之後十代至文公列為諸侯至惠王僭號稱王至王假為秦所滅今州即秦河東郡地也漢元年項羽封魏豹為西魏王王河東都平陽二年豹降從漢王在滎陽請歸侍親疾至則絕河津反為楚盡有太原上黨地九月韓信虜豹定魏地置河東上黨太原郡文帝時季布為河東守文帝謂曰河東吾股肱郡故特召君耳後魏太武帝于今州理置雍州延和元年改雍州為秦州周明帝改秦州為蒲州因蒲坂以為名隋大業三年罷州又置河東郡隋將屈突通守河東

高祖師次桑泉縣通出守潼關乃令鷹揚郎將堯君素
王行本留鎮郡城遂于今桑泉縣置河東郡武德元年
罷郡置蒲州其年堯君素爲賊人薛宋李楚客所殺王
行本仍堅守不賓二年置蒲州總管三年行本歸化自
桑泉移蒲州于今理九年廢總管置都督府復爲州開
元元年五月改爲河中府仍置中都麗正殿學士韓覃
上疏陳其不可至六月詔停復爲州乾元三年又改爲
河中府大歷中元載爲相又上建中都議曰自古建大
功者未嘗不用天因地故高祖保關中光武據河內皆

元和郡縣志

卷十四

二

深根固本以制天下臣等攷天地之心本聖人之意驗
古往之事切當今之務則莫若建河中爲中都隸陝虢
晉絳汾潞儀石慈隰等十城爲藩衛長安去中都三百
里順流而東邑居相望有羊腸底柱之險羊腸在潞州壺關縣東南

一百六里濁河孟門之限

孟門在慈州文城縣西南

以輶轅

爲襟帶與關中爲表裏劉敬所謂扼天下之吭而撫其
背卽此之謂推是而言則建中都將欲固長安非欲外
之也將欲安成周非欲捨之也將欲制蠻夷非欲懼之
也將欲定天下非欲弱之也河中之地左右王都黃河

北來太華南倚總水陸之形勝鬱關河之氣色每歲白露既降涼風已高陛下處金城湯池內綏華夏登信臣驍將外馭戎狄出于仲秋還于農隙有漕濁泛舟之便無登高履險之虞不傷財不害人得養威而時狩如此則國有保安之所家無係虜之憂矣疏奏不省初代宗自幸陝之後每歲八九月間京師恟恟常懼犬戎復至將相之家皆裝儲糗爲行李之備載知人情不安遂獻此疏冀因制置竊有兵權議亦宏博盡當時利害然代宗探見載意議故不行或曰建中都江融設險圖之首

元和郡縣志

卷十四

三

篇也融誅後書已不傳不知斯言何自而得

府境

東北一百七十七里

八到

西南至上都三百二十里
東至東都五百八十五里

東南至虢州一百八十五里

西南至同州六十七里

東北至絳州取桐鄉路二百六十里

貢賦

開元貢

麥麩扇
鳳栖梨

竹扇
乾棗

漆匣
龍骨

賦

綿

絹

布

麻

管縣八

河東 河西 臨晉 猗氏 虞鄉 寶鼎

解 永樂

河東縣 次赤郭下

本漢蒲坂縣地也屬河東郡隋開皇三年罷郡縣仍屬蒲州十六年移蒲坂縣于城東仍千今理別置河東縣大業二年省蒲坂縣入河東縣

雷首山一名中條山在縣南十五里

風陵堆山在縣南五十五里與潼關相對

長原一名蒲坂在縣東二里其原出龍骨

元和郡縣志 卷十四 四

河水北自桑泉縣界流入

媯汭水源出縣南雷首山尚書曰釐降二女于媯汭

州城卽蒲坂城也城中有舜廟城外有舜宅及二妃壇

故陶城在縣北四十里尚書大傳曰舜陶于河濱

故堯城在縣南二十八里

蒲坂關一名蒲津關在縣西四里魏志曰太祖西征馬超韓遂夜渡蒲津關卽謂此也今造舟爲梁其制甚盛每歲徵竹索價謂之橋脚錢數至二萬亦關河之巨防

焉

風陵故關一名風陵津在縣南五十里魏太祖西征韓遂自潼關北渡卽其處也

舜祠在州理舜城中貞觀十一年詔致祭以時灑掃

伯夷墓在縣南三十五里雷首山南貞觀十一年詔致祭禁樵蘇

河西縣 次赤郭下

本朝邑縣東地乾元三年因置河中府割朝邑縣置

臨晉縣 次畿西南至府七十四里

本漢舊縣地也後魏改爲北解縣隋開皇十六年分猗

元和郡縣志

卷十四

五

氏縣于今理置桑泉縣因縣東桑泉故城以爲名也天寶十二年改爲臨晉

河水經縣西四十里

涑水在縣東二十三里

故解城本春秋時解梁城又爲漢解縣城也在縣東南十八里晉惠公許賂秦伯以河外列城五東盡虢略內及解梁城是也

桑泉故城在縣東十三里左傳曰重耳圍令狐入桑泉謂此也

故司空魏國公裴寂墓在縣東北十七里

猗氏縣

次畿西南至府一百一十里

本漢舊縣卽猗頓之所居也東魏恭帝二年改猗氏爲桑泉縣周明帝復改桑泉爲猗氏縣屬汾陰郡隋開皇三年罷郡屬蒲州

涑水經縣南六里

故郇邑在縣西南四里左傳曰晉侯謀去故絳欲居郇瑕氏之地韓獻子曰郇瑕氏土薄水淺不如新田遂遷新田卽平陽絳邑縣也

元和郡縣志

卷十四

六

虞鄉縣

次畿西至府七十里

本漢解縣地也後魏孝文帝改置南解縣屬河東郡周明帝武成二年廢南解縣別置綏化縣武帝改綏化爲虞鄉
檀道山一名百梯山在縣西南十二里山高萬仞躋攀者百梯方可升降故曰百梯山南有穴莫測深淺每有敕使投金龍于此兼醮焉

王官故城在縣南二里左傳曰秦伯涉河焚舟取王官

案

後聞喜縣王官故城在縣南十五里以虞鄉在聞喜西南言之王官故城當在虞鄉縣東此云在縣南二里

誤有

五老仙人祠在縣西十里

寶鼎縣 次畿南至府一百一十里

本漢汾陰縣也屬河東郡劉元海時廢汾陰縣入蒲坂

縣後魏孝文帝復置汾陰縣開元十一年改寶鼎縣

黃河在縣北十一里趙簡子沈佞臣欒激之所也 案激攷欒

呂氏春秋及水經注竝作欒激

汾水北去縣二十五里

后土祠在縣西北一十一里

元和郡縣志 卷十四 七

殷湯陵在縣北四十三里

解縣 次畿西北至府四十五里

本漢舊縣也屬河東郡隋大業二年省解縣九年自綏

化故城移虞鄉縣于廢解縣理即今縣理是也武德元

年改虞鄉縣為解縣屬虞州因漢舊名也仍于蒲州界

別置虞鄉縣貞觀十七年廢虞州解縣屬河中府

中條山在縣南二十里

鹽池在縣東十里

女鹽池在縣西北三里東西二十五里南北二十里鹽

味少苦不及縣東大池鹽俗言此池亢旱鹽卽凝結如逢霖雨鹽則不生今大池與安邑縣池總謂之雨池官置使以領之每歲收利納一百六十萬貫

熨斗陂在縣東北二十五里

通路自縣東南踰中條山出白徑趨陝州之道也山嶺參天左右壁立間不容軌謂之石門路出其中名之白徑嶺焉

永樂縣

次畿北至府九十里

本漢河北縣地周明帝改河北縣爲永樂縣武帝省永

元和郡縣志

卷十四

八

樂縣以地屬芮城縣武德二年分芮城于縣東北二里永固堡重置永樂屬芮州七年移于今理貞觀八年改屬河中府

中條山在縣北三十里

河水經縣南二里

永樂澗水源出中條山經縣東二里又南入河

五老山在縣東北十三里堯升首山觀河渚有五老人飛爲流星上入昴因號其山爲五老山

絳州

絳郡雄

開元戶八萬一千二百七十一
元和戶一萬一千二百七十一

案鄉一百七十六
鄉數傳寫缺

禹貢冀州之域春秋時屬晉左傳曰晉人謀去故絳欲居郇瑕氏之地韓獻子曰郇瑕氏土薄水淺不如新田遂遷新田注曰新田今平陽絳邑縣是也三卿滅晉其地屬魏戰國時亦爲魏地秦爲河東郡地今州卽漢河東郡之臨汾縣地也魏正始八年分河東河北置平陽郡又爲平陽郡地後魏太武帝于今理西南二十里正平縣界柏壁置東雍州及正平郡其地屬焉孝文帝廢東雍州東魏靜帝復置周明帝武成二年改東雍州爲元和郡縣志

卷十四

九

絳州隋大業三年廢州爲絳郡初義師將西入關大將軍進次古堆去絳郡十餘里通守陳叔達堅守不下高祖命廚人曰明日早下絳城然後食乃引兵攻城自旦及辰破之仍置絳郡武德元年罷郡置絳州總管三年復爲絳州

州境

東西南北三百六十五里

八到

東南西南至上都五百九十里
東南至東都取垣縣王屋路四百八十里

東至澤州四百四十里
南至陝州二百四十里

西北至晉州一百四十里
東北至慈州一百四十里

貢賦 開元貢 梨 蠟 防風
賦 布 麻

管縣九

正平 太平 萬泉 曲沃 翼城 聞喜

絳 稷山 龍門

正平縣 望郭下

本漢臨汾縣地屬河東郡隋開皇三年罷郡改屬絳州十八年改臨汾縣爲正平縣因正平故郡城爲名也汾水東北自曲沃縣界流入

澮水東自曲沃縣流入

元和郡縣志

卷十四

十

柏壁在縣西南二十里後魏明帝元年于此置柏壁鎮太武帝廢鎮置東雍州及正平郡周武帝于此改置絳州建德六年又自此移絳州于今稷山縣西南二十里玉壁按柏壁高二丈五尺周迴八里晉虓祁宮在縣南六里左傳曰石言于晉魏榆師曠曰石不能言或憑焉抑又聞之作事不時怨讎動于人則有非言之物而言于是晉侯方築虓祁之宮今按宮南有澮水北有汾水俱西流至宮西而合隋末依宮餘址築堡今名修義堡

晉靈公臺在縣西北三十一里左傳曰晉靈公不君從臺上彈人觀其避九卽此臺也

武平故關在縣西三十里高齊時置周平齊廢

晉齊姜墓在縣南九里申生之母也

驪姬墓在縣南八里

太平縣緊南至州五十里

本漢臨汾縣地屬河東郡後魏太武帝于今縣東北二十七里太平故關城置泰平縣屬平陽郡周改泰平爲太平因關名隋開皇三年罷郡改屬晉州十年改屬絳州

元和郡縣志

卷十四

十一

州

汾水在縣東二十九里

太平故關城在縣東北二十七里

白波壘在縣東南十二里後漢末黃巾賊于西河白汲谷寇太原于此築壘

子奇壘在縣東三十里後秦王姚興遣弟義陽公平字子奇與征虜將軍狄伯支等步騎四萬伐魏攻平陽陷之遂據柴壁魏軍大至截汾水以守之平大敗將麾下三十騎赴汾水而死狄伯支等十將四萬人皆爲魏所

擒今按此壘西臨汾水壘側尙有柴村子奇投汾水卽此處也

趙盾祠在縣西南十八里

李牧祠在縣東北十三里

晉公孫杵臼程嬰墓並在縣南二十一里趙盾墓瑩中萬泉縣上東北至州一百二十里

本漢汾陰縣地屬河東郡又薛通城者後魏道武帝天賜元年赫連勃勃僭號夏侵河外于時有縣人薛通率宗族千餘家西去漢汾陰縣城八十里築城自固因名元和郡縣志

卷十四

十二

之武德三年于薛通故城置萬泉縣屬泰州縣東谷中有井泉百餘區因名萬泉貞觀十七年廢泰州縣屬絳州

曲沃縣緊西至州五十里

本晉舊都絳縣地也漢以爲絳縣屬河東郡後漢加邑字屬郡不改晉改屬平陽郡後魏孝文帝于今縣東南十里置曲沃縣屬正平郡因晉曲沃爲名隋開皇三年罷正平郡改屬絳州

絳山在縣南十三里出銅鈔

汾水西南去縣二十二里

澮水在縣南二里

絳水在縣東南三十里

漢絳縣本春秋晉都新田也在縣南二里周勃爲絳侯卽其地也今號絳邑故城

陘庭故城在縣西北二十里左傳曰曲沃武公伐翼次于陘庭是也

臺駘神祠在縣西三十六里左傳曰晉侯有疾卜臺駘爲崇問于子產子產曰昔金天氏有裔子曰昧爲玄冥

元和郡縣志

卷十四

十三

師生允格臺駘能業其官帝用嘉之封諸汾川今晉主汾而滅之由是觀之則臺駘汾神也

翼城縣

望西南至州一百里

本漢絳縣地屬河東郡後魏明帝置北絳縣隋開皇末改爲翼城縣屬絳州因縣東古翼城爲名也武德元年于此置澮州二年廢澮州縣屬絳州

澮高山在縣東南二十五里澮水出焉其山出鐵隋于此置平泉冶

澮水今改名翼水

故翼城在縣東南十五里晉故絳都也

故唐城在縣西二十里堯裔子所封也

聞喜縣 望西北至州六十里

本漢左邑縣之桐鄉也武帝元鼎六年將幸緱氏至此聞南越破大喜因立聞喜縣屬河東郡後魏改屬正平郡隋開皇三年罷郡屬絳州

景山在縣東南十八里

董澤一名董池陂在縣東北十四里左傳廚武子曰董澤之蒲可勝既乎

元和郡縣志

卷十四

十四

桐鄉故城漢聞喜縣也在縣西南八里俗以此城爲伊尹放太甲于桐宮之所孔注尙書曰桐湯葬地也按今地有放太甲處在偃師縣界非此也又漢大司農朱邑屬其子葬桐鄉者又在今舒州界亦非此也

王官故城今名王城在縣南十五里左傳曰俘我王官

案此與虞鄉縣王官故城各引左傳證之雖異文而實一王官據此在聞喜縣南十五里則前所云在虞鄉縣南二里者其誤益明

祁奚墓在縣東二十二里今太原祁縣又有祁奚墓未詳孰是

絳縣 上西北至州八十里

本漢聞喜縣地後魏孝文帝置南絳縣其地屬焉因縣北絳山爲名也屬正平郡恭帝去南字直爲絳縣隋開皇三年罷郡改屬絳州義寧元年屬翼城郡武德元年屬澧州二年改屬絳州

備窮山在縣東北二十五里出鐵鈔穴五所

絳水一名沸泉水在縣北十四里出絳山東谷懸流奔壑一十許丈西北注于澧史記稱智伯率韓魏引晉水灌晉陽不沈者三版智伯曰吾始不知水之可以亡人

元和郡縣志

卷十四

十五

國也乃今知之汾水可以灌安邑絳水可以灌晉陽晉文公墓在縣東二十里左傳曰文公卒將殯于曲沃出絳柩有聲如牛貞觀十一年詔致祭五十步禁樵蘇

稷山縣

緊東至州四十九里

本漢聞喜縣地屬河東郡後魏孝文帝于今縣東南三十里置高涼縣屬龍門郡隋開皇三年罷郡縣屬絳州十八年改爲稷山縣因縣南稷山以爲名也

稷山在縣南五十五里左傳曰晉侯理兵于稷以略狄土卽此地也

汾水在縣南五十里

玉壁故城在縣南十二里後魏大統四年東道行臺王思政表築玉壁城因自鎮之八年高歡寇玉壁思政有備攻不克周初于此置玉壁總管武帝建德六年廢總管城周迴八十里四面並臨深谷

稷祠在縣南五十里稷山上

義和墓在縣東北十七里

龍門縣

望東至州一百一十里

古耿國殷王祖乙所都晉獻公滅之以封趙夙秦置爲

元和郡縣志

卷十四

十六

皮氏縣漢屬河東郡後魏太武帝改皮氏爲龍門縣因龍門山爲名屬北鄉郡隋開皇三年廢郡以縣屬絳州十六年割屬蒲州武德三年屬泰州貞觀十七年廢泰州縣隸絳州

汾水北去縣五里漢武帝行幸河東作秋風詞卽此水也

故耿城在縣南十二里古耿國也

伏龍原在縣西南十八里

黃河北去縣二十五里卽龍門口也禹貢曰浮于積石

至于龍門注曰龍門山在河東之西界大禹導河積石
疏決龍門卽斯處也河口廣八十步巖際鐫迹遺功尚
存三秦記曰河津一名龍門水陸不通魚鼈之屬莫能
上江海大魚集龍門下數千不得上上則爲龍故曰曝
鰓龍門水經注曰其魚出鞏縣鞏穴每三月則上渡龍
門得則爲龍否則點額而還

蜚廉故城在縣南七里

龍門關在縣西北二十二里

大禹祠在縣西二十五里龍門山上隋末摧毀貞觀九

元和郡縣志

卷十四

十七

年奉敕更令修理

高祖神堯皇帝廟在禹廟南絕頂之上畫行幸儀衛之
像蓋義寧初義旗至此也

元和郡縣志卷十四